

天台山全志

天台山全志卷之八

楚郢張聯元覺菴輯

僊道

漢

劉晨阮肇

漢永平五年剡縣劉晨阮肇共入天台山

採藥路迷不得返經十三日糧盡遙望山上桃樹有

子實攀緣藤葛乃得上各噉數枚饑止體充復下山

持杯取水欲盥噉見蕪菁葉從山腹流出甚鮮復一

杯流出有胡麻飯糝便逆流行二三里至一大溪邊

有二女子姿質妙絕見二人持杯出僊笑曰劉阮二

天台山志 卷之八  
郎捉向所失流杯來晨肇緣二女子便呼其姓如有  
舊乃相見問來何晚因邀還家其家銅瓦屋西壁東  
壁下各有一大牀皆施絳帳四維帳角懸鈴金銀交  
錯牀頭各有十侍婢二女云劉阮二郎經涉山岨向  
雖得桃實猶尚虛可速作食食胡麻飯山羊脯牛肉  
甚美食畢行酒有一羣女來各持五三桃子笑曰賀  
汝婿來酒酣作樂暮令各就一帳宿女就之言聲清  
婉令人忘憂遂停半年氣候草木是春時百鳥啼鳴  
更懷悲思求歸甚苦女曰使君思家當可如何遂呼  
前來女子集會奏樂共送劉阮指示還路既出親舊

零落邑屋改異無相識問訊得七世孫傳聞上世入山逃不得歸至晉太元八年復去不知何所

劉根 字君安長安人隱永嘉飛霞洞嘗至天台赤城

訪紫極君

見仙家雜記  
葛洪神仙傳

張皓 字文明汝南人漢安帝永初中遇封衡授以青要紫書金根上經及神丹半兩戒之曰勤則得之替則失之皓受命入赤城山服丹行道久之耳能洞聽目能徹視常有學者迫訪之或爲白鶴或爲飛雲搏空遊虛隱沒莫見至魏明帝太和初登真

吳

葛元 字孝先入天台赤城遇左元放授以九丹金液  
仙經劾鬼秘法三元真一妙經行持三年廣積功効  
光和二年正月朔感太上老君敕真人徐來勤等同  
降於天台授靈寶經三十六卷桐柏舊有法輪院三  
真降經之處及僊公役鬼所築受誥壇存焉道成於  
天台山立壇授道微五嶽真形圖曰吾昔受左元放  
先生今付於汝後聞僊樂嘹唳乘白鶴繞空而舉位  
爲太上玉宗太極左宮僊公

晉

袁根柏碩 剡縣人因驅羊度赤城山忽有石門豁然

見二女方笄遂爲室家後謝歸女以香囊遺之根後

羽化碩年九十餘

見搜神記

白雲先生 洞天福地記靈墟乃白雲先生隱處世說  
載王右軍得筆法於白雲先生又按野史辯才云右  
軍作蘭亭記三百七十五字始夢天台了貞傳授筆  
訣以永字爲法云

許邁 勾曲人入懸霤山改名遠遊服術黃精後移赤  
城服玉液面有童顏爲地僊中品

葛洪 字稚川丹陽句容人少好學家貧自伐薪以買  
紙筆尋書問義不遠數千里尤好神仙導養之法從

祖葛仙翁元以煉丹秘術授弟子鄭隱洪就隱學悉得其法鮑元亦傳元業以女妻之初爲參軍咸和初王導選爲散騎常侍領國史固辭不受聞交趾出丹砂求爲勾漏令至廣止羅浮山後曾煉丹於天台天姥有慶雲甘露之瑞洪嘗自序云洪體乏進趨之才偶好無爲之業假令奮翅則能凌厲元霄騁足則能追風躡景猶欲戢勁翮於鷦鷯之羣藏逸跡於跛躄之伍何況大塊稟我以尋常之短羽造化假我以至鶩之蹇足自卜者審不能者止豈敢力蒼蠅而慕冲天之舉策跛驚而追飛兔之軌哉是以望絕於榮華

之途而志安乎窮阨之域藜藿有八珍之甘蓬蓽有藻稅之樂也予所著黃白之事曰內篇其餘駁雜通釋曰外篇凡一百一十六篇雖不足藏之名山且欲緘之金匱以示識者自號抱朴子因以名書及舊碑誄詩賦及神仙隱逸集異等傳併五經史漢百家言方技雜事與金匱藥方等書共數百卷後尸解

羊愔 永和三年愔兄忻爲台州樂安令遊阮郎亭崖上有字世傳阮肇題愔醉亭畔七日方醒夢入洞遇靈英食青靈芝百節俱輕自括蒼往天台一日可到日行三四百里



夏馥 字子治陳留人入桐柏山遇王真人授以黃水

雲漿之法在洞中爲明晨侍郎

見陶弘景真誥

王元甫 沛人同吳人鄧伯元學道於赤城受臆青精飯吞日精丹景之法內見五臟冥夜能書穆帝永中間與鄧伯元乘雲駕龍白日昇天爲中嶽真人

齊

褚伯玉 錢塘人年十六家爲娶婦乘車而入伯玉踰垣而出隱於天台中峰二十年樵人見之在重巖之下顏色怡怡左右惟松屑二裹復於嶮之小香鑪峰建金庭觀齊高帝徵之不起移居大霍山偃去

梁

徐則 字則本剡人入緡雲山脩道太極徐真人降謂

曰汝當爲王者師然後得道因廬天台山所資惟松水而已梁武帝詔講道要徐陵欽其風致爲作頌焉

晉王楊廣召問道法旣至則辭以日時不利至五更寂然返真柩自江都送還天台多見則徒步返至舊隱令弟子掃一室曰有客至宜延之於此有頃跨石

梁而去翌日柩至方知其異

見隋書及徐靈府小錄

陶弘景 秣陵人字通明號華陽隱居嘗居寧海閭風里與張少霞煉丹常夢神告曰山在後海在前金笈

玉筍居兩邊是中可以藏汝丹遂藏丹焉

見南史隱逸傳

唐

王遠知

天台道士也其母夢靈鳳有娠僧寶誌曰此

子當爲神仙宗伯年七歲日覽萬言十五入華陽事

陶貞白授三洞正一法潘師正是其入室弟子而司

馬承禎則師正弟子也遠知善易知人死生禍福作

易總十五卷一日雷雨雲霧中老人叱之曰汝所著

書何在上帝命吾攝六丁雷電追取傍有衣青衣人

已捧書立矣又以少時誤傷一童子唇不得白日昇

天署少室僊伯將行沐浴焚香而化年一百二十六

歲後於東海借迅風與人飛渡至登州

司馬承禎 字子微洛州溫人事潘師正傳辟穀導引術遍遊名山唐武后嘗召之未幾去與陳子昂王維李白孟浩然賀知章盧藏用宋之問王適畢構爲僊宗十友睿宗復迎至京師訪以治道曰游心於淡冷氣於漠與物自然而無容私焉則天下治帝嘆詠曰廣成之言何以加此辭歸天台盧藏用指終南山曰此中大有佳處何必天台對曰以僕觀之乃仕宦之捷徑爾盧初隱終南後登朝聞言殊有慚色承禎還山元宗與公卿俱以詩餞之女貞有名焦靜貞者詣

承禎求度未幾昇天嘗降人間謂薛季昌曰司馬先生得道高於陶都水之任當爲東華上清真人一日謂弟子曰吾於玉霄峰東望蓬萊有靈真降駕今爲東海小青童君東華君所召必須往俄頃化去如蟬蛻弟子葬其衣冠焉時年八十有九元宗親撰碑文有脩真秘旨天地宮府圖坐忘論登真系等書行於世詔贈銀青光祿大夫謚貞一先生

陳世安

京兆人好道遇仙白日昇天治小台山

見總仙傳

汪子華

字時美三舉不第遂與顏真卿同事白雲先生張約再師赤城先生司馬承禎丹成道備貞元五

年白日昇天

王可交 蘇州人嘗棹舟入松江中流見畫舫有道士  
七人皆玉冠霞帔一人呼可交與二粟命黃衣送上  
岸但令合眼洎開眼已失黃衣但見峰巒中松柏參  
天問之乃天台山瀑布寺前也自是不食後挈妻子  
入四明山不復出

見靈異考

許碣 高陽人少舉進士不第學道於王屋山周遊五

嶽自荆湘抵天台山

見續仙傳

郡志載碣於台山懸崖人

不及處題曰許碣自峨峯山尋偃月子至此按許碣

自稱高陽酒徒嘗作詩云閩苑花前是醉鄉誤翻王

母九霞觴羣仙拍掌嫌輕薄謫向人間作酒狂宇內  
名山無不遍歷登武夷山幔亭絕頂題云許碣自峨  
眉山尋偃月子到此非題於台山之懸崖也

王旻 不知何許人天寶中賜號太和先生年七百歲

往來天台貌如嬰孩

見湖海紀聞

夏侯隱 不知何許人因尋仙遊天台獨止一室或露

宿草樹間人呼睡仙

見仙傳拾遺

葉法善 字道元松陽人有役使鬼神之術開元初爲

銀青光祿大夫鴻臚卿封越國公充景隆觀主嘗於

八月望夜引明皇遊月宮聆月中天樂顯慶中奉命

脩黃籙齋於天台山桐柏觀

甘泉先生 不知何許人隱華頂峰頻詔不起開元十八年元宗特於王屋山置臺觀以居之

吳筠 字正節通經義美文詞入嵩山依潘師正究其術南遊天台觀滄海與有名士相娛樂明皇召問每開陳皆名教世務後復返剡中

田虛應 字良逸薛季昌以上清太洞法授之潭州早蓬髮無言而雨降久雨不止默然岸幘而坐卽霽元和中入天台不復出憲宗詔不起

馮惟良 字雲翼師田虛應元和中入天台元稹聞其



風而悅之桐柏觀自貞一先生完葺以來惟良乃再  
締構作上清室降真堂白雲亭脩閣亭復貞一先生  
之迹以三洞之道行於江表憲宗詔不起

吳善經 縉雲仙都山人年十七爲道士遍登匡廬天  
台三茅元和間羽化

應夷節 字適中汝南人也唐明皇開元中高士應凝  
之曾孫七歲詣蘭谿靈瑞觀出家年十三與道士籍  
久之遊天台按上清大法自陶隱居傳王遠知王傳  
潘師正潘傳司馬承禎司馬傳薛季昌薛傳田良逸  
田傳馮惟良馮傳夷節也唐武宗會昌中就天台桐

柏觀之西南別建淨壇以居觀察使李褒來問道因  
奏請院額詔以道元爲名拾遺張穎撰記公卿以師  
名奏聞詔賜服號固辭回昭宗乾寧中沐浴解化及  
遷神就窆但空棺而已

劉處靜

自號天台曲糲人會昌中與葉藏質應夷節

爲林泉友

見舊唐書

左元澤

永嘉人惟介不隨俗居玉霄峰三年絕粒不

語常製真一頌

見赤城志

又按續志載左同仁卽元澤師

徐徵君常遊山經句不返樵者見與三虎坐不食五

穀後尸解

見總仙傳

閻丘方遠 字大方舒州宿松人也幼而辯慧年十九  
問大丹於香林左元澤復詣仙都山隱真嚴事劉處  
靜學脩其出世之術三十四歲受法錄於天台玉霄  
宮葉藏質守一行氣之暇篤好子史羣書常自言葛  
稚川陶貞白吾之師友也銓太平經爲三十篇備盡  
樞要聲播江淮間唐昭宗景福二年彭城王錢鏐慕  
方遠道德訪於餘杭大滌洞築室宇以安之昭宗累  
徵之不赴召降詔褒異賜號妙有大師元圃先生天  
復二年尸解葬於大滌洞之傍白鹿山後有人於仙  
都山及廬山累見之自言我舍大滌洞歸隱滌山天

柱源也

陳寡言 字太初越人隱於玉霄峰號曰華林以詩詠  
自娛其山居詩云醉臥茅簷不閉關覺來開眼看青  
山松花落處宿緣在麋鹿羣從林際還弟子有劉介  
者奉几杖二十年盡寡言之道寡言將尸解謂劉介  
曰當盛我以布囊置石室中慎勿以木爲也又以詩  
示徒曰我本無形暫有形偶來人世逐營營輪迴債  
負今還了搔首索然歸上清別有詩十篇舊在天台

道元院

徐靈府 號默希子錢塘天目山人通儒學無冀於名

利居天台雲蓋峰虎頭巖石室會昌中頻詔不起獻  
詩言志曰野性歌三樂皇恩出九重來頒紫宸命遣  
下白雲峰多愧書傳鶴深慚紙畫龍將何佐明主甘  
老在巖松居山凡十餘年絕粒久之年八十二卒著  
元鑑五篇詮通元真經十二篇及撰天台山記三洞  
要略寒山子集敘

葉藏質 字含象處州松陽人法善之裔也詣天台馮  
惟良授三洞經籙於玉霄峰選勝創道齋號石門山  
居日誦道德度人二經晚年尤精符術請之者如織  
婺州牧爲邪物所撓詣請符至中路犯穢失之牧親

造見案上有封筒封檢甚固乃前之符也因焚香置  
匣捧歸祟物遂絕唐懿宗優詔石門山居爲玉霄觀  
忽命酒召其友應夷節同飲告以行日及期題於門  
曰雞鳴時去門人聞珠珮雜鼓樂聲於空中須臾羽  
化年七十四

杜光庭 字聖賓號東瀛子或云括蒼人爲時臣儒唐  
懿宗朝與鄭雲叟賦萬言不第遂入道事天台山應  
夷節嘗謂道法科教自漢天師暨陸脩靜撰集以來  
歲月綿邈幾將廢墜遂考真誥條例始末故天下羽  
禩永受其賜鄭畋薦其文於朝僖宗召見賜以紫服

象簡充麟德殿文章應制爲道門鑿袖遊成都喜青  
城山雲溪氣象磅礴遂結茅居之溪蓋薛昌真人飛  
昇之地也一日忽謂門人曰吾昨夢朝上帝以吾作  
岷峩主司恐不久於世時後唐莊宗長興四年年八  
十四跌坐而化蜀主王建初欲大用之爲張裕所沮  
賜號廣德先生又欲優於名秩以爲諫議大夫封蔡  
國公進號廣成先生

劉方瀛

天台道士受天師劔法符籙嘗咒水愈疾

見

笈七  
籤

莫道士

不知何名孫邨有與天台莫道士書

王文果 天台道士有詩集一卷

見崇文總目

金柔 天台道士與刺史鄭冊爲方外之友後柔亦得

道

朱霄外 章安人善河圖秘緯持法甚嚴錢忠懿王給

驛以進錫賚不受

按天台崇道觀有題梁云吳越兩街道統天台道門威儀棧嶺真廟德

大師通元先生正一天師檢校太傅兼太保上柱國吳郡開國公食邑一千五百戶朱霄外建

五代至宋

呂洞賓 遊天台居福聖觀靈應事跡甚多嘗題一絕

於壁云青蛇繞地月徘徊夜靜雲閑鶴未回欲度有緣人換骨暫畱踪跡在天台宋紹興間一丐者負其



母歌於市但云只兩口既久詢羣丐所聚則無是人  
一日到台州出崇和門至泉井洋擲其母於水乃一  
巨瓢跨而昇空人方思兩口乃呂字也

厲歸真 天台人性嗜酒冬夏常衣單衣妙於水墨見  
屋壁卽畫鵲時人不知其得道也天祐三年於中條  
山白日冲天告時人曰吾本台州府唐興縣人有弟  
在彼脫下破布衫服星簪羽袂而輕舉雲中寥寥有  
簫管之聲

張伯端 天台人字平叔少好學晚遊蜀遇劉海蟾授  
金液還丹火候之訣乃改名用誠號紫陽自謂得形

神俱妙之道歸以所得萃成秘訣八十一首號悟真篇曰平生所學盡在此矣後世宗之稱爲天台仙派年九十九歲趺坐而化得舍利千百大者如芡實色皆紺碧至淳熙中其家蚤起見一道流踞上席而坐叩其家事歷歷值其孫他出乃去人以爲用誠之歸云又郡志載用誠臨海人爲吏在府辦事家送膳至衆以其所食魚戲匿之梁間平叔疑其婢行竊歸撲其婢婢自經死一日蟲自梁間下驗之魚爛蟲出也平叔喟然嘆曰積贖盈箱其中類竊魚事不知凡幾因賦詩曰刀筆隨身四十年是非非是萬千千一家

溫飽千家怨半世功名百世愆紫綬金章今已矣芒  
鞋竹杖任悠然有人問我蓬萊路雲在青山月在天  
賦畢將所署案卷盡焚之遂按火燒文書律遣戍先  
是郡城有鹽頰每食鹽數十觔平叔奉之最謹臨別  
囑曰若遇難但呼祖師三聲卽解汝厄械至百步溪  
天炎浴溪中遂仙去百步嶺舊有紫陽真人祠扁云  
紫陽神化處

白玉蟾 號瓊瑄姓葛名長庚大父閩人董教瓊州遂  
居瓊而玉蟾生焉祖父繼亡母他適因冒白姓天資  
聰敏十歲應童子科命賦織機詩詠曰大地山河作

織機百花如錦柳如絲虛空白處做一疋日月雙梭  
天外飛遇泥丸真人陳翠虛攜入羅浮又於黎母山  
中遇神人授以洞元雷法能呼召雷雨馘攝精魔又  
用都天大雷之法祈禳輒應云得法於張伯端之再  
傳往來天台遍遊名山博洽羣書文思汪洋頃刻數  
千言又善草書封紫清明道真人又嘗舟過鄱陽值  
日暮艤泊玉蟾剪紙月噓於檣端皎然舟行無阻又  
嘗酒酣墮西湖衆驚呼援溺達旦則在水上猶醺然  
也後見於海豐縣嘉定末詔徵赴闕稱旨命館太乙  
宮一日不知所往

王茂端 行上清大洞法通真達靈事驗甚著養母至  
百歲自年九十八清健不衰人呼爲靈寶其弟契真  
亦行大洞法號小靈寶所著靈寶教法秘籙十卷畱  
桐柏觀

張無夢 字靈隱號鴻濛子與种放劉海蟾結爲方外  
友事陳希夷先生多得微旨久之遊天台登赤城廬  
於瓊臺行赤松導引安期還丹之法居十餘載詠脩  
煉事題曰還元篇夏英公獻於真宗召對令講易卽  
說謙卦曰方大有之時宜守之以謙除著作郎不受  
後召講還元篇曰國猶身也心無爲則氣和氣和則

萬寶結矣心有爲則氣亂氣亂則英華散矣此還元之大旨也上以歌一闕賜之還山令台州給著作郎俸以養老有黃白術秘而不言居瓊臺又十餘年後到金陵有瓊臺詩集行世

皇甫坦 字履道遇朱桃椎真人頂有珠光顯仁太后目疾夢坦能醫令人物色得之治目卽愈畱一扇禁中患瘡者用之皆驗平都山柏枯二十年矣呵氣再榮凡四赴召命靈跡甚著隆興中遊天台會康壽殿產靈芝遣使至天台山賜沉香二百兩至乾道初方遊武當後還青城

陳景元 字大靈號碧虛子遊天台遇張無夢授秘術  
宋神宗詔講道錄善書所注有道德經注莊子注高  
士傳等集

毛洞元 不知何許人隱蓮華峰石湖范參政有詩贈  
之

張雲友 天台縣人元明宮道士白玉蟾以其有僊風  
道骨勸往瓊臺卓菴

祝通元 桐柏觀道士專事脩煉所著脩真詩五首在  
桐柏觀

元

張雨 字伯雨年二十棄家遊天台諸山傳正一之法  
又受七十二家符篆于虞集嘗作台仙閣記與薛元  
卿章心遠毛伯元和友善而文字之交則虞楊袁范  
諸君也詩類大曆間諸子文類漢人引敗筆點綴木  
石人物亦自賞適作字勁健在陶貞白上年七十六  
羽化後百餘年墓爲居人所發鋤擊陶器裂其腦容  
色如生而貯法書二帙發塚者取一帙示鄭太史環  
太史欲并得全帙令其人且攜書歸置市肆橫閣扇  
側雷擊一聲失其書歸視腦亦完好書二帙仍在其  
前驚掩之



天台山志 卷之二  
曹法師 居天台溪南爲桐柏觀道士謁張真人回至  
杭適大旱禱雨無應法師書片紙粘背上曰雨出賣  
官聞之命往吳山行事用一大甕盛水燒磚投其中  
青天轟雷一聲神將立左右曰上蒼主旱雨不可求  
法師曰權借太湖三尺水須臾陰雲四合大雨平地  
尺餘簷下水有鮮魚蘊草諸司厚貺皆不受居家除  
淫祠伐妖樹滅邪魔救疾苦禱雨祈晴俱應有法劍  
藥磨存焉

女僊

班孟 是女仙不知何許人能飛行或終日坐空中語

人語又能沒入地中或含墨噴紙成字各有意義飲酒餌丹年四百餘歲童顏鶴髮後入天台不知其終

見葛洪

仙傳

魏華存

字賢安司徒文康公之女幼而好道志慕神

仙年八十三托劍化形而去後太微黃老君授以玉

劄金文位爲紫虛元使治天台

見集仙錄及夫人內傳

謝自然

華陽女冠幼而入道慕南嶽魏夫人之操至

天台從司馬子微學道後白日仙去

見續仙傳

焦靜貞

女貞焦靜貞泛海詣蓬萊求師至一山見道

者指言曰天台山司馬承禎名在丹臺身居赤城爾

良師也靜貞還詣承禎求度未幾昇天

天台山全志卷之九

楚郢張聯元覺菴輯

古蹟

高察讀書堂

在察嶺下有讀書堂遺址天台邑志載

漢高察隱居於此按赤城志載臨海縣南有高湖係

吳太常高察置則高察似屬三國吳時人

煉丹井

在華頂峰旁一在桐柏觀鐘樓之下舊傳葛

元煉丹之所

茶圃

在華頂峰旁相傳爲葛元種茶之圃

白雲先生居

在靈墟

黃經洞 在華頂峰旁王右軍爲白雲先生書黃庭經  
云藏於此

太白讀書堂 在華頂峰旁李白嘗遊天台後人爲建  
書堂

墨池 在華頂峰旁相傳爲王右軍洗筆池一在白巖  
寺又嵯縣金庭觀卽王右軍宅有右軍書樓及墨池  
顧歡讀書堂 在東岫又剡志載顧歡隱剡山齊高帝  
踐祚徵至都稱山谷臣不仕

五廉察歇亭 在大慈寺西北當華頂石橋之衝孟  
廉察浙東捐俸以建爲遊人憩息今廢

柳刺史宅 在丹霞洞側唐元和間柳泌於此領務備

藥築室號紫霄山居其中多靈葩翠莖脩篁奇竹又有曲池環沼藥室丹爐按郡志載唐憲宗晚好神仙詔天下求方士皇甫鏞薦復州柳泌能合長生藥詔起泌居興唐觀煉藥泌言於上曰天台山神仙所聚多芝草異藥臣雖知之力不能致誠得爲彼長吏庶幾可求上信之以泌權台州刺史服金紫諫官爭論奏以爲自古無使方士臨民賦政者上曰煩一州之力而能爲人主致長生臣子何愛焉由是羣臣莫敢言泌至台州驅吏民採藥歲餘無所得而懼舉家逃

入山中浙東觀察使捕送京師上復使待詔翰林服其藥日燥渴竟以致死穆宗立乃杖殺泌按泌墓在福聖觀東碑記載元和十五年十月葬杖殺之說恐未必然

賀元樞寓居 在萬年寺西有應心泉

徐竹溪書院 在東橫山有竹溪釣臺在其側

宋閣學宅 在赤城西五里有樵隱園今廢

禹鐘 玉霄峰麓洞天宮有禹鐘高二尺重百餘觔形如鐸上有三十六敵有文隱起相傳夏禹所鑄或云

越王樂器嘗空中夜鳴墮入禹廟咸通中浙東李紇

之爲鐘銘具以歲月刻其上以惠玉霄道士葉藏質  
禹跡寺僧頻求不得因令僧與不逞輩入玉霄伏板  
閣下取鐘際之背羣呼而走約行三十里迨明猶在  
閣畔視之背鐘者僵矣餘黨癡惜鐘失復歸又有大  
鐘漢乾祐二年鑄今皆不存矣

貧婆鐘 廣嚴寺鑄一鐘屢不就有老嫗施一錢投於  
冶中鐘卽成而錢宛然在焉號貧婆鐘

石經幢 在高明寺連座蓋高四尺許幢體八方上刻  
尊勝咒末題云晉天福二年捨入幽溪禪院

寒拾舊竈 在國清寺



石壘寨 在關嶺之北壘石爲之唐廣德元年王師討袁晁處今遺跡尚存

洗馬潭寨 唐裘甫之亂王師戰於福聖觀前時以國清建寨此洗馬潭寨未知果在何時

手書

天台觀 吳赤烏元年爲葛仙翁建天台觀卽福聖觀也葛元飛白書天台觀三字王右軍極贊之

陀羅尼經 四卷僧智顛手書舊在脩禪寺至唐宋時失去一卷四明僧元通習智顛書法補完又別書四卷後復散失今慧明寺所存者是元通所書

華嚴經 唐虞世南書在脩禪寺後爲秦檜取去

天台佛 大中國清之寺 唐大中五年重建國清寺

散騎常侍柳公權書大中國清之寺六字又天台佛

三字

石刻

天台山 佛隴 以上五字楷書在脩禪寺前宋僧志

南字指堂書傍有指堂字

天台仙界 在桃源邑令鄭至道書

華頂峰 在華頂

普賢境界 在脩禪寺前石壁上僧智顛楷書

幽溪 在高明寺幽溪之上智顛楷書

結集 釋籤 俱小篆在赤城巖唐僧清觀書

玉京 在赤城山

蓋竹洞天 大篆在石橋旁題云大宋嘉泰壬戌奉議

郎知天台縣事晉陵丁大榮書

曹源 在國清寺宋譙國曹勳楷書

潛真洞 在寒石山宋米芾行書

萬松徑 在萬松徑上志南楷書

瞻風 八分在石橋瞻風亭側不知何人書

石梁 在石梁晉江莊一俊行書

星橋勝槩 在石橋主簿靈壁王榭行書

飛梁懸瀑 八分在石橋潭上廬陵甘雨書

教源 八分在脩禪寺前邑人許光宇書傳燈云雖無  
題名嘗見其鐫石

塔

降魔塔 在華頂舊傳智顛降魔之處後人建塔久廢  
明王中丞士性重建

赤城塔 在赤城山巔七級高二十丈梁岳陽王如建  
舊有三所今惟餘一中藏佛舍利子四十九顆五代  
僧德韶重修中藏二十八顆餘散安別寺台山之塔

惟赤城巔最古宋僧般若新寺甃塔記按越都圖經  
併古碑云梁朝岳陽王者是昭明太子第三子卽梁  
蕭譽是也於赤城山頂造甃塔三所中有如來舍利  
四十九顆其塔至唐會昌間廢咸通中脩顯德七年  
般若寺沙門德韶重建纔啓舊甃石獲舍利四十九  
粒迎歸紫凝山遂累甃而僧俗雲萃再安舍利二十  
八顆畱舍利二十一顆散安東都府內併應天寺國  
清寺護國寺等處

國清寺前大塔 隋遣司馬王弘爲智顓建

寺內二甃塔 德韶建分安赤城塔舍利各三顆

寺前七塔

寺前二小塔

萬松徑二塔 三處俱隋時建

護國寺二塔 德韶建各安舍利三顆

白巖塔 在白巖寺後山上七級高十五丈僧普耀建

萬年寺塔 自詢建今廢

寶華寺塔 七級高二十丈唐乾符間建

真覺寺前雙塔 僧智顛龕前今廢

寒山塔 在寒山寺石洞側寒山子入滅後有梵僧杖

錫拾黃金鎖子骨或問所以對曰吾拾文殊菩薩舍

利歸西天耳後人於此建塔

碑碣 文已亡者錄其名於左

桐柏觀頌 唐元宗撰

褚伯玉碑 南齊孔稚圭撰

重建桐柏上清閣記 唐集賢院直學士鄭仁規撰

脩桐柏觀記 唐元稹劉處靜撰

佛隴禪林寺碑 唐台州司馬陳諫撰元和四年刺史

徐放書

善利亭記 唐博州防禦使韓衍撰

賜道士葉藏質請玉霄宮敕 乾符四年立紹興二十

一年重刻

桐柏觀建金籙齋記 宋台州郡守曾會撰又有設醮

銘靈寶齋投文記其文亦會撰

天台觀碑 宋隱居徐觀撰寧熙四年道士杜有廷書

碑陰有趙抃晁端彥楊璠張璠等題字又有刻云建

安游茂先遊福聖觀濺珠亭觀瀑布宋紹興四年九

月題

九天僕射祠記 台州郡倅李彙撰紹興十一年姑蘇

丁椿書

重脩老君殿記 天台居士鮑疑撰隆興二年松陽陳



戒書

玉霄宮記 殿中侍御史內供奉陸潛撰乾符二年立

重建國清寺碑銘 福建安府司參議謝伋撰提舉主

隆觀曹勛書主管崇道觀賀允中撰額紹興十八年

立

訶羅神像記 宋苾芻慧遠撰釋蘊常書

國清三隱堂記 禹穴沙門志南撰紹興二年立

護國寺碑銘 中書平章錢惟演撰天聖九年工部尚

書李端懿書檢校司空鄂州刺史錢惟濟篆額

無相寺記 禮部員外郎楊傑撰元祐六年禮部郎中

博陵崔度書主客郎中河南鞠承之篆額

廣嚴院記

宋苾蒭有嚴撰則休書縣令吳師正篆額

傳教寺碑

特進判和州錢弘俶撰

福聖院記

吳越國王錢弘俶撰

導元院記

秘書校書郎張仁穎撰仙都山道士葉璠

秀書

重脩桐柏道藏記

宋台州通判夏竦撰

重脩三真人殿碑

句曲山道士王簡竹撰范子誼書

薛如初篆額元豐五年立

萬年寺覽衆亭記

福建轉運副使賀允中撰紹興十

二年立

萬年寺塗田記 大理少卿宋之瑞撰紹興三年提舉

浙東常平倉黃唐書

智者塔鉢孟記 台州通判賈廷臣撰紹興六年書

智者大師贊 宋無爲楊傑撰又飛白隸書淨名堂三

字扁

淨慧寺記 宋承議郎致仕韓韶撰

習養瀑泉記 宋陳襄撰

佛隴記 宋龍圖閣直學士葉清仁撰

石橋羅漢聖蹟記 宋天台縣令太史章撰

石橋寺碑 宋僧嚴首座撰書

重建法輪真一宮記 元學士虞集撰

娑羅軒記 元僧梵琦撰

重建桐柏山門記 明道士吳彥欽撰

以上碑文俱亡

天台山全志卷之十

楚郢張聯元覺菴輯

存疑

天台山 陶弘景真誥云天台山高一萬八千丈李白詩云天台四萬八千丈對此欲倒東南傾似亦非無所據而云然

赤城山 魏夫人傳云天台山下有祠堂方五里乃司命君府其東南二門有日月三辰之精光燭洞天徐靈府小錄云其下別有洞臺方二百里魏夫人所治南馳縉雲北接四明東距溟渤西通剡川中有明月

三辰瑤花芝草自晉宋梁隋暨唐天寶常以日中星  
鳥望秩茲山

月光童子 嵩高山東南大巖下有人見石孔中有大  
宮闕自然明燭與日月無異有六仙人云月光童子  
在天台往來此中非有道不得見

見巨鰲記  
總仙記

茅盈 漢景帝時人其高祖濛字初成秦時至華山飛  
昇先是童謠曰神仙得道茅初成駕龍上昇入太清  
時下元洲戲赤城繼世而往在我盈帝若學之臘嘉  
平盈年十八學道後道成至哀帝時乘雲駕龍至太

霍赤城玉洞之府

見道乘屬辭  
及臨海圖經

侍經仙郎 王思真位爲太上侍經仙郎漢靈帝光和二年己未正月一日太上老君降于天台山命思真披九光之韞書洞元大洞等經三十六卷以授太極左仙公葛元

小兒誦經聲 開元中文靖天師與司馬承禎赴長生殿千秋節齋直中夜行道畢隔雲屏各就枕斯須忽聞小兒誦經聲玲玲如金玉響天師乃褰裳躡步而窺之見承禎額上有小日如錢光耀一席逼而聽之乃承禎腦中之聲也天師還謂其徒曰黃庭經云泥丸九真皆有房方圓一寸處此中又云左神公子發

神語其先生之謂乎

賀監昇仙 賀知章字季真為秘書監晚年號四明狂客天寶初乞歸為道士詔賜鏡湖剡川一曲按許鼎撰通和先生祖貫碑云貫學黃老初賀監得攝生之術負笈賣藥數百年不死後于天台山昇仙元和中

貫嘗遇之

見高道傳又唐書隱逸傳云知章嘗棄官入道昇仙之說恐未必然

李元 開元間嘗遊華山採藥忽一日騎白鹿謂山下

人曰我今遊天台有三老人遮道畱之不可

見王簡疑仙傳

寒山子現身 毘陵道士李褐性褊急好凌侮人有貧

士相詣卽勿顧數日有乘白馬而來禮接之曰頗相



記乎視其貌乃前之貧士謂褐曰子知有寒山子乎  
曰知曰卽吾是也始謂子可教今不可也脩生之道  
除嗜去欲嗇神抱和所以無累也內抑其心外檢其  
身所以無過也先人後己知柔守謙所以安身也善  
推於人不善歸之於身所以積德也功不在大立之  
無怠惡不在小去之不貳所以積功也三毒未剪冠  
裳爲飾可謂虎豹之鞞而犬羊之質也出門乘馬而  
去竟不復見

台郡志云此論甚佳當與寒山詩並刊  
勸世李褐何知寧足煩文殊現身耶

問丘太守影 明巖洞口有帽影馬跡傳係問丘太守  
謁寒山拾得於國清寺二仙出門去追及至此因拍

手笑入巖巖遂闔丘亦蛻于此

鐵船湖 在羅漢嶺下湖中有荷以水寒不花相傳有羅漢泛鐵船于此

推室相奉 赤城山臥佛巖側祀韋卿山神世所謂登壇五百大神也晉太元中僧曇猷居石室坐禪有猛虎數十蹲在猷前猷誦經自若一虎獨睡猷以如意叩虎頭問何不聽經俄而羣虎皆去有頃巨蛇競出大十圍舉頭向猷經半日復去後一日神現形詣猷曰法師威德既重來止此山弟子願推室以相奉猷曰貧道尋山願得相接何不共住神曰部屬未洽遠

人來往或相侵觸人神道異是以去耳猷曰本是值  
神居之欲移何處去耶神曰夏帝之子居于此山二

千餘年寒石是我舅所治當還彼住臨別執手贈猷

香三盃于是鳴鞞吹角凌雲而去

太元中松蘭憩赤城一日有神長數

丈屈膝自言願推室相奉齊普遊傳亦載有神江白郎願推室相奉

又曇猷行至石橋

道經一石室于中憩息俄而雲霧晦合室中盡鳴猷  
色無擾明旦見人著皂衣噴來曰此乃僕之所居昨  
不在室中遂致騷動猷曰若是君家請以相還神曰  
僕家室已移請爾無辭

洗腸井 在赤城相傳曇猷洗腸處井邊猶生青茝

乾溪 曇猷初至天台遇一嫗問途忽有負而投諸淵者猷飛錫救之水立涸今乾溪是也

玉京昇仙會 張惟忠赤城錄云天台玉京觀舊有昇仙會歲選道士一人冠服劍佩儀宇甚都迫暮送登山頂候天駕來迎衆至夜分果遙見天中二燈燦然有光簫鼓仙樂齊鳴須臾不見衆真以爲仙去不知爲白蟒怪也曇猷戾止中巖宴坐神化猛虎數十咆哮向師旣不能害又見白蟒真形呀然開口將噬師師卽以飛錫入蟒口拄其齧齧不得合曰且借老僧坐地三年神始知懼皆來降伏悔罪願徙他處自此

昇仙之會息矣後人于穴中見白骨成堆蓋卽白蟒所啖昇仙者也

金錢池 在赤城山相傳曇蘭憩此誦經有神獻金錢蘭葉之池中故名

招手石 在定光菴之東峰三石列峙高丈許色同赤城僧智顛初作沙門夢見極高山臨于大海有僧招手喚之且以臂接引曰汝當居此汝當終此及入天台宿定光菴定光謂曰還憶夢中招手事乎古語云定光金地遙招手智者江陵暗點頭是也

龍母山 在寧海縣筋竹嶺之東吳尚書屈晃之子坦

偕其母隱湫水山後化爲龍母亦尸解葬其處世所謂龍母山也隋開皇九年僧智顛自建業來至此山薄暮睹一大廈莫知何所扣戶有老嫗出迎顛已知爲龍遂託宿焉母云師遠來何以幸教戒曰旱宜施

雨母受令惟謹翌日顛去回視其處已成湫矣

台郡祀屈

坦爲城隍神後追祀兕封靈佑侯

金橋 宋景祐中僧明照亦因採藥于桃源見金橋跨

水有二女戲水上

護聖瓜 石橋石罅有木瓜花時一蛇蟠其上至實落供大士乃去號護聖瓜

石鎖巖呻吟聲 大小石鎖巖相傳其地積陰夜聞呻吟聲云是冥司拷掠之所按唐裴甫作亂王師會戰于此豈死者之精魄未散而然耶今久無矣

華頂陰刑 岳飛字鵬舉力戰圖復中原秦檜主和議促召班師矯詔殺飛父子飛死爲神居天台第一峰擒檜受諸苦楚楊維禎樂府詩云生兮人之英死兮厲之靈萬八千丈兮華之頂帝命我兮司陰刑

王十朋記人說生前事 予少時有鄉僧每見予必謂曰此郎嚴伯威後身也予不曉所謂旣而訪諸叔父寶印大師叔父曰嚴閣黎字伯威汝祖母賈之兄吾

之舅氏且法門之師也博學善詩文飛行脩飭有聲  
江浙間爲士俗所推重汝父母旣以無子爲憂禱求  
甚力至政和壬辰之正月吾師卒汝祖一夕夢吾師  
至家手集衆花結成一大毬字汝祖而遺之曰孝祖  
君家求此久矣吾是以來忽不見是月汝母有娠至  
十月而汝生吾師眉濃黑而垂目深而神藏兒時能  
誦千言喜作詩人以汝眉目及趣好類之且符所夢  
又謂吾師死之月而汝受胎也故云予幼從學鹿巖  
人有指予眉垂目藏而斲之者表丈賈元達曰此子  
眉目類吾伯嚴闍黎他日能文未可知也然嚴闍黎



智慧名德卓卓如許縱未脫輪迴當復生人間世爲  
大善知識胡爲于滅度之後鍾成迂愚魯鈍之性現  
此窮薄困苦相耶予嘗寫字作文貽寶印叔父叔父  
曰人言汝吾師也文僅似之字乃爾不同邪嚴闍黎  
尤工筆札子最不善書故也紹興庚午七月二十日  
因作文寫字兩俱不佳媿而曰嚴闍黎汝前生食蔬  
何多智今生食肉何許愚也用記之又台郡志載宋  
王十朋詹事熙寧中至石橋自云嘗夢遊一處見峰  
巒秀異林木陰邃有僧往來其間旁有石橋子立橋  
畔見一碑讀之僧曰公前身所書也扣其何人曰嚴

首座也今至此覽其山水一如夢中所見因題詩云  
石橋未到已先知入眼端如入夢時僧喚我爲巖首  
座前身曾寫此橋碑巖首座字伯威亦永嘉人宋閣  
學之瑞又云某隆興初泰第時因到石梁時菴主道  
京云向王狀元遊此某因云此橋記乃永嘉巖首座  
書安知非公前身公笑曰師所言暗與某意合某誕  
時有夢巖首座入臥房者故詩及之又溫郡志勝載  
宋僧有處巖者博涉能文詩碑碣多出其筆翰墨亦  
臻妙品所著有潛澗集王十朋將產其母夢巖來惠  
以金環夢覺而巖適坐化遂產十朋紹興間十朋道

經石橋寺寺僧先夢迎嚴和尚詰旦而十朋至故有  
人喚我爲嚴首座之詩

鬼國赴會 宋乾德中錢忠懿王在國時歲會天台山  
設冥道齋是時命判官陳用文往山監護夜將曉聞  
木杪有人聲視其形黑色衆愕然用杖扣之云某姓  
陳住杭州觀音巷入番被惡風飄墮鬼國因取其女  
爲妻昨日元帥府有牒召赴台州冥會妻與某偕來  
令坐大木上某因曾持念大悲陀羅尼經聞僧誦此  
因記念之妻遂捨去用文歸杭引見忠懿召家屬視  
之皆懼而不識陳遂述其舊事始末乃知其祖也抱

之而泣忠懿嘆異賜錢百餘却復人身十餘年終

志

設醮供僧 宋紹興中方士李季為秦檜赴桐柏山設

醮至越之樗浦石關干憩道旁遇異人謂季曰君來

何為季告其故其人太息曰秦今死矣張浚劉錡皆

起為將相秦豈得存耶季大駭亟去至天台而秦之

訃至矣景定中賈似道命僧妙弘建曇花亭既成供

五百聖僧茶茶甌中一一現異華中有四字曰大士

供應聚觀者神之古來奸臣造業無已却思設醮供

僧求免罪過致為李季妙弘等所愚仙佛有知早應

載郡

齒冷縱茶花現異寧免鄭虎臣毒手而人每不悟爲

之奈何

戴郡志